



E je stade une schirie di events che a si son incrosâts... l'Ostîr che za di un pôc al veve tal cjâf di meti dongje une cunvigne di contecurtârs, Nello che al ven a fâ un zîr in Patrie, Jacum che al bute l'idee, Venusia, la gnove sporteliste di Listize (e Talmassons, e Cjasteons, e Mortean) che e propon di fâ alc... e insome, in cuatri e cuatri vot, ve che la robe e devente, e cun chest articul nô de Ostarie al è cuntune vore di gust che us invidin ducj al prin maraveôs bielnon imprevedibil...

CONTECURTE DAY

Si che duncje, cu la poie dal Sportel di lenghe furlane dal Comun di Listize, **Domenie ai 31 di Zenâr, aes 5 sot sere, li de Vile Bellavitis a Listize**, intal edifici dulà che e je la Biblioteche, (dongje de Farmacie, par chei che a no cognossin il paîs) si davuelzarà **une gare di contis curtis, vierte a ducj, sedi ai contecurtârs, sedi a chei che a àn voie di diventâlu in cheste ocasion.**

La gare no je nuie altri che une scuse par inmaneâ un spetacul, si che o varin:

il nestri incredibil e valorôs **Famei: *Checo Tam***

in nestri acüst resint, aromai bielzà che spatussât, il **Berlon *Michêl Londar***
e doi gnûf acuisçj!

Une **Camarele trastolone come *Lussia di Uanis***

Un musicist par meti daûr des contis cualchi sunôr, il **Cjantôr: *Bizio Citos***

E al è clâr che a presentâ dute cheste clape di matuçs e a dirizi la gare al sarâ il vuestri fidât
Ostîr, *Rafaêl Serafin*.

Ma cemût si puedial partecipâ a la competizion? Cuntune conte, al è clâr!

**Une conte che e à di jessi *mandade a Contecurte* dentri dal 28 di Zenâr e e à di jessi
inedite e che dome l'autôr le cognòs, parcè che in gare nol sarâ l'autôr, ma la sô
conte. Cun di plui, la conte no à di superâ lis 2000 batudis e chest colp, par
esigjencis di leture, il limit al è tassatîf. (*come lis regulis de ostarie*, insome).**

**L'Ostîr al riceverâ lis contis, al sarâ l'unic a cognossi l'autôr e lis ametarâ in gare,
fin a rivâ a un numar gjestibil di participants.**

Ce altri dî?

Ben po... che l'event al il prin di cheste fate, tant par scomençâ, e che no si pues pierduli,
ancje par vie che insomp, in grazie dal **Agriturism Pituel** di Talmassons, il vincidôr nol larâ
cjase a mans vueidis.

Ae fin, cun di plui, un ghiringhel finâl.

Insome... contecurtârs di cumò e di doman, partecipait (*ancje su fb*), *sparniçait*, vigneit.